

摘藻堂四庫全書薈要

集部

欽定四庫全書薈要

集部

權文公集卷一至五



臣
王杰詳校
詳校官助教臣常循

欽定四庫全書薈要

權文公集目錄

卷一


賦詩

卷二

詩

卷三

詩



卷四

詩

卷五

詩

卷六

詩

卷七

詩

卷八

歌詞

卷九

詩

卷十

詩

臣等謹案權文公集十卷唐權德輿撰德

輿字載之天水人官至同平章事事迹具唐

書本傳德輿嘗自纂制集五十卷楊憑序之
其孫憲又編其詩文為五十卷楊嗣復序之
今制集已佚文集亦久無傳本此本乃明嘉
靖二十年楊慎得之於滇南僅存目錄及詩
賦十卷劉大謨序而刻之又刪其無書之目
錄德輿文集舊目遂不可考惟文苑英華及
唐文粹中時時散見尚有出此本之外者耳
考王士禎居易錄載權文公集五十卷註曰

詩賦十卷文四十卷碑銘八卷議論二卷記

二卷集序三卷贈送序四卷策問一卷書二

卷疏表狀五卷祭文三卷稱無錫顧宸藏本

劉體仁之子凡寫之以貽士禎者然則德輿

全集康熙中猶存不識何以今所傳者皆楊

慎之殘本第士禎所註卷目以數計之乃八

十卷與五十卷之說不合又不識其何故今

既無可參證姑仍楊慎本錄之焉乾隆四十

二年十一月恭校上

總纂官

臣

紀昀

臣

陸錫熊

臣

孫士毅

總

校

官

臣

陸

費

墀

權文公集原序

唐有天下二百二十載用文章顯於時代有其人然而
自成童就傅以及考終命解巾筮仕以及鈞衡師保造
次必於是視聽必於是文采皆正色而無駁雜調韻皆
正聲而無奇邪滔滔如江河東注不知其極而又處命
書綸綍之任專考覈品藻之柄參化成輔翊之勲初中
終全而有之得之於相國文公矣公諱德輿字載之天
水人也族望祖宗之遠當官行己之道語在國史銘於

擴而碑於途此不敢詳今所載者因緣文業而已早歲為淮南江西從事掾管記室之任屬詞詣理奏入而報可移文走檄疆事迎解登朝為起居舍人改駕部員外郎換司勳郎中遷中書舍人凡四任九年專掌詔誥大則發德音修典冊洒朝廷之利澤增盛德之形容小則褒才能叙官業區分流品申明沮勸無誕詞無巧語誠直溫潤真王者之言公昔自纂錄為制集五十卷託於友人湖南觀察使楊公憑為之序故今不在編次之內

其他千名萬狀隨意所屬牢籠今古窮極微細周流於
親愛情理之間磅礴於勲賢久大之業不為利疚不以
菲廢本乎道以行乎文故能獨步當時人人心服非以
德爵齒挾而致之貞元中奏詔考定賢良草澤之士升
名者十七人及為禮部侍郎擢進士第七十有二鸞鳳
杞梓舉集其門登輔相之位者前後十人其他征鎮岳
牧文昌掖垣之選不可悉數方且繼居重任者猶森然
非精識洞鑒鑒其詞而知其人何以臻此耶憲宗皇帝

紹開中興始初英明申威提法武功既愈文教是圖元和五年冬執政暴疾既瘖且痺未旬日而公作相憲章儒術潤色王度使和聲順氣發自廊廟而滄浹於幽遐我之所長時以推戴王立冰潔無緇磷遷染之譏以德自終豈徒然哉嗣復不佞發跡門館儀曹台席皆忝前躅公之元子中書舍人璩不幸短命其嗣憲孫泣奉文集求鄙文以冠篇首雖觀於巨海難挹於波濤而藉用白茅所資誠敬其五十卷次第具在集目楊嗣復撰

欽定四庫全書薈要卷一萬三千七百六

集部

權文公集卷一

唐 權德輿 撰

賦 詩

傷馴鳥賦

紛羽族之多端兮同翺飛而類殊有鸛鵒之微禽亦播
質於洪鑪因稚子之嬉遊得中園之墜雛恣飲啄以馴
擾來目前與座隅爾乃棲以籠檻鍛其羽翼留軒所以

為娛俾遐翫之無力乍踉蹌而將舉顧襪褫而復息雖
主人之見容終使喪天和於自得或親賓至止微軫徐
觸每聞絃而鼓翼亦逗節而翹足貌宛轉以成態聲間
闕而助曲乍寂寞以閑暇若凝情於相矚理輕毳以自
潔類山玄之佩玉每翔集以安卑同君子之自牧思謝
尚之起舞邁風流之逸躅苟魯昭之不君因乾侯之出
辱方渡濟以申儆伊涼德之自覆徵故老之相傳驗曩
記之或存在端午之司辰剪其舌而能言巧喉嚅以達

情順人心而不諼方渴日以呈材願朱明之駿奔忽愀
愴以顚顚響哀音於簾箔竟啁啾而不去若徊翔之有
託怳心訝而未辯歟狸狌之攫搏俄斃踣而不勝紛血
灑以毛落彼葛盧與冶長通鳥獸之音聲闕君子之周
防無古人之至精既不能縱爾於遼廓又不能遂爾之
生成使異類之得志曾未極其飛鳴則本夫養之之惠
適所以害其生生又憶夫清江之使者東海之波臣苟
其時之不來則剗腸而涸鱗鷄鐘鼓而反悲馬皂棧而

多死雖為遇之已甚固又失其天理嘗聞乎聖賢之理
物也愚智殊方薰猶異藏善用無棄兮牙見其長各有
攸處兮兩不相傷官天地而府萬物繇此道而為常吾既
悞斯理之不早因失之而後防收視聽以冥觀兮遂羣
性之茫茫

洞庭春溜滿賦

送陸灞赴荊州

湖渺渺兮蕩東風以發春春溜滿兮連淨綠以無垠接
遠色於青草散晴輝於白蘋及夫反照安流烟花明麗

霞生水底鳥沒空際聽櫂謳之四起見片帆之遠逝杳
空曠以澄鮮窮千里於一睇若乃路轉潯陽波連沅湘
杜蘅秀兮蕙若芳寫雲翠兮沉夕陽月明露下靄蒼蒼
結遐想於騷人兮悄目極以心傷婉婉長離翩翩綵鷁
遠泛桃花之浪去從蓮府之辟雲兮水兮指前程於空
碧

行舟逗遠樹賦

送嚴暮赴東陽

有美一人兮桂為楫蘭為舟逗遠樹之晴影泛春江之

碧流乍迷雲葉稍映蘋洲凝暮色於愁睇空藹藹以悠
悠的的輕帆亭亭遠質喜揚舲之漸近嗟轉岸而還失
映微波以蔥蒨貯嵐翠之蒙密愴南浦之別離占橫塘
之風日柳怨別兮楓傷春望不辨兮愁殺人空江邊兮
遠郊外紛離緒兮相對顰顰標落照以微明暮夕烟而又
晦波茫茫兮景沉沉思結纜於清陰惜歸舟之不駐傷
遠目以軫離心

奉和聖製九月十八日賜百寮追賞因書所懷

錫宴朝野洽追歡堯舜情秋堂絲管動水榭烟霞生黃
花媚新霽碧樹含餘清同和六律應交泰萬寓平春藻
下中天湛恩闡文明小臣諒何以亦此影華纓

奉和聖製九日言懷賜中書門下及百寮

令節在豐歲皇情喜又安絲竹調六律簪裾列千官烟
霜暮景清水木秋光寒筵開曲池上望盡終南端天文
麗慶霄墨妙驚飛鸞願言黃花酒永奉今日歡

奉和聖製重陽日中外同歡以詩言志因示百

寮

玉醴宴嘉節拜恩歡有餘煌煌菊花秀馥馥萸房舒白露秋稼熟清風天籟虛和聲度簫韶瑞氣深儲胥百辟皆醉止萬方今宴如宸衷在化成藻思煥瓊琚微臣徒竊抃豈足歌唐虞

奉和聖製中春麟德殿會百寮觀新樂

仲春藹芳景內廷宴羣臣森森列千戚濟濟趨鈞陳大樂本天地中和序人倫正聲邁咸濩易象含義文玉俎

映朝服金鈿明舞茵韶光雪初霽聖藻風自薰時泰恩
澤溥功成行綴新賡歌仰昭回竊比華封人

奉和聖製中和節百官宴集因示所懷

萬方慶嘉節宴喜皇澤均曉開堦葉初景麗星鳥春藻
思貞百度著明並三辰物情舒在陽時令弘至仁衢酒
和樂被薰絃聲曲新賡歌武弁側永荷玄化醇

奉和聖製重陽日即事六韻

嘉節在陽數至歡朝野同恩隨千鍾洽慶屬五稼豐時

菊洗露華秋池涵霽空金絲響仙樂劍烏羅宗公天道
光下濟睿詞敷大中多慙擊壤曲何以答堯聰

奉和聖製豐年多慶九日示懷

寒露應秋杪清光澄曙空澤均行葦厚年慶華黍豐聲
明暢八表宴喜陶九功文麗日月合樂和天地同聖言
在推誠臣職惟匪躬瑣細何以報飄飛淳化中

贈文敬太子廟時享退文舞迎武舞樂章

干旄羽籥相虧蔽一進一退殊行綴昔獻三雍盛禮容

今陳六佾崇儀制

讀穀梁傳二首

荀寅士吉射誠乃蔽聰明奈何趙志父專舉晉陽兵下
令漢七國借此以為名吾嘉徙薪智禍亂何由生

憶昔梁會豈伊無諸侯羣臣自盟軟君政如贅旒有
力則宗楚何人復尊周空文徒爾貶命去更誰尤

劉紹相訪夜話因書即事

故人愴久別茲夕款郊扉山僮漉野醞穉子褰書帷清

露泣珠瑩金波流玉微忘言我造適瞪視君無違但令
靜勝躁自使癯者肥不待遽生年從此知昔非

卧病喜惠上人李鍊師茅處士見訪因以贈

沉疴結繁慮卧見書窓曙方外三賢人惠然來相親整
巾起曳策喜非車馬客支郎有佳文新句凌碧雲霓裳
何飄飄浩志凌紫氛復有沉冥士遠係三茅君各言麋
鹿性不與簪組羣清言出象繫曠跡逃玄纁心源暫澄
寂世故方糾紛終當逐師輩巖桂香氤芬

多病戲書因示長孺

行年未四十已覺百病生
眼眩飛蠅影耳厭遠蟬聲
甘辛敗六藏冰炭交七情
唯思曲肱枕搔首擲華纓

古興

月中有桂樹無翼難上天
海底有龍珠下隔萬丈淵
人生大限雖百歲就中三十稱
一世晦明烏兔相推遷
雪霜漸到雙鬢邊
沉憂戚戚多浩歎
不得如意居太半
一氣暫聚常恐散
黃河清兮白石爛

感寓

殘雨倦欹枕病中時序分秋蟲與秋葉一夜隔窻聞虛
室對搖落晤言無與羣冥心試觀化世故如絲棼但看
鳶戾天豈見山出雲下里徒擊節朱絃秘南薰梧桐秀
朝陽上有威鳳文終待九成奏來儀瑞吾君

跌傷伏枕有勸釀酒者暫忘所苦因有一絕
一杯宜病士四體委胡床暫得遺形處陶然在醉鄉
病中苦熱

三伏鼓洪爐支離一病夫倦眠身似火渴飲汗如珠
悸乏心難定沉煩氣欲無何時灑微雨因與好風俱

覽鏡見白鬚數莖光鮮特異

秋來皎潔白鬚光試脫朝簪學酒狂一曲酣歌還自樂
兒孫嬉笑挽衣裳

南亭曉坐因以示璩

隱几日無事風交松桂枝園廬含曉霽草木發華姿
跡似南山隱官從小宰移萬殊同野馬方寸即靈龜弱質

常多病流年近始哀圖書傳授處家有一男兒

竹逕偶然作

退朝此休沐閉戶無塵氛杖策入幽逕清風隨此君琴觴恣偃傲蘭蕙相氛氲幽賞方自適林西烟景曛

拜昭陵過咸陽墅

李子乏二頃揚雄才一廛伊予此南畝數已踰前賢頃歲辱明命銘勳鏤貞堅遂茲操書致內顧增缺然乃葺場圃事迄今三四年適因昭陵拜得抵咸陽田田夫競

致辭鄉耆爭來前村盤既羅列雞黍皆珍鮮古稱祿代
耕人以食為天自慙廩給厚諒使井稅先塗塗溝塍霧
漠漠桑柘烟荒蹊沒古木精舍臨秋泉池籠豈所安樵
牧乃所便終當解纓絡田里諧因緣

早春南亭即事

虛齋坐清晝梅坼柳條鮮節候開新歷筋骸減故年振
衣慙艾綬閱鏡嘆華顛獨有開懷處孫孩戲目前
璩授京兆府叅軍戲書以示兼呈獨孤郎

金剛經疏 卷一
見爾府中趨初官足慰吾老牛還舐犢凡鳥亦將離喜
至翻成感癡來或欲殊因慙玉潤客應笑此非夫

書紳詩

和靜有真質斯人稱最靈感物惑天性觸理紛多名禍
機生隱微智者鑒未形敗禮因近習喆人自居貞當令
念慮端鄙嫚不能萌萌苟非不踰矩焉得遂性情謹之在
事初動用各有程千里起步武彗雲自織莖心源一流
放駭浪奔長鯨淵木苟端深枝流則貞清和理通性術

悠久方昭明先師留中庸可以導此生

侍從遊後湖讌望

絕境殊不遠湖塘直吾廬烟霞旦夕生
泛覽誠可娛慈顏俯見喻輟爾詩與書
清旭理輕舟嬉遊散煩劬宿雨蕩殘燠
惠風與之俱心靈一開曠機巧眇已疎
中流有荷花花實相芬敷田田綠葉映
艷艷紅姿舒繁香好風結淨質清露濡
丹霞無容輝嬌色亦踟躕穠芳射水木
欹葉游龜魚化工若有情生植皆不如
輕舟任汨汨畢

景乃躊躇家人亦恬曠稚齒皆忻愉素絃激淒清旨酒
盈罇壺壽觴既頻獻樂極隨歌呼圓月初出海澄輝來
滿湖清光照酒酣頰傾百慮無以茲心目暢敞彼名利
途輕肥何為者漿藿自有餘願銷區中累保此湖上居
無用誠自適年年翫芙蕖

晨坐寓興

清晨坐虛齋羣動寂未諠泊然一室內因見萬化源得
喪心既齊清淨教益敦境來每自愜理勝或不言亭柯

見榮枯止水知清渾悠悠世上人此理法難論

郊居歲暮因書所懷

養拙方去諠深居絕人事返耕忘帝力樂道陳代累脩
然衡茅下便有江海意寧知肉食尊自覺儒衣貴烟霜
當暮節水石多幽致三徑日間安千峰對深邃策藜出
村渡岸幘尋古寺月魄清夜琴猿聲警朝寐地偏芝桂
長境勝烟霞異獨馬帶晴光疎篁淨寒翠窻前風葉下
枕上溪雲至散髮對農書齋心看道記清言覈名理開

卷窮精義求譽觀朶頤危身陷芳餌紛吾守孤直世業
常恐墜就學緝韋編銘心對敬器元和暢萬物動植咸
使遂素履期不諭永懷丘中志

暮春閒居示同志

避諠非傲世幽興樂郊園好古每開卷居貧常閉門曙
鐘來古寺旭日上西軒稍與清境會暫無塵事煩靜看
雲起滅閒望鳥飛翻乍問山僧偈時聽漁父言體羸諳
藥性事簡見心源冠帶驚年長詩書喜道存小池泉脈

湊危棟燕雛喧風入松陰靜花添竹影繁灌園輸井稅
學稼奉晨昏此外知何有怡然向一樽

秋病初愈月夜詠左思招隱詩因而成詠

閒吟理輕步不厭涼風永斷續風際聲清羸月中影螢
光拂花露泉脈連桐井心暢百慮銷境閒萬籟靜前賢
有遺韻顧我三日省郎懷方自怡星河漸耿耿

卧病初愈崔侍御相訪

移疾門常掩今朝枉繡衣笑言心乍愜拜伏力猶微晚

歲貞筠少貧家上客稀如何忽相訪里巷有清輝

夏雨率成呈邑中諸公

片雲飛暮雨瀟灑小亭閒細響疎無裏微涼坐卧間已
深池際水更綠枕前山未敢勞車馬柴扉且閉關

與故人夜坐道舊

笑語歡今夕烟霞愴昔遊清羸還對月遲暮更逢秋勝
理方自得浮名不在求終當製初服相與卧林丘

自咎

自咎咎何窮飄然華戶中清時名未立稔歲室猶空幽
獨慙芳桂飛鳴羨早鴻

闕

何所見嘆息向秋風

田家即事

閒卧藜床對落暉脩然便覺世情非漠漠稻花資旅食
青青荷葉製儒衣山僧相訪期中飮漁父同遊或夜歸
待學尚平婚嫁畢渚烟溪月共忘機

寓興

弱冠無所就百憂鍾一身世德既顛墜素懷亦堙淪風

烟隔高丘羸疾滯漳濱昭代未通籍豐年猶食貧敢求
庖有魚但慮甌生塵俛首愧僮僕蹇步羞親賓豈伊當
途者一一由中人已矣勿復言吾將問秋旻

浩歌

杖策出蓬葦浩歌秋興長北風吹荷衣蕭颯景氣涼通
達抵山郭里巷連湖光孤雲淨遠峯綠水溢方塘魚鳥
樂天性雜英互芬芳我心獨何為萬慮縈中腸履道身
未泰主家謀不臧心為世教牽跡寄翰墨場出處兩未

定羈羸空自傷沉憂不可裁佇立河之梁晚歸茅簷下
左右陳壺觴獨酌復長謠放心遊八荒得喪同一域是
非亦何常胡為苦此生矻矻徒自強乃知杯中物可使
憂患忘因茲謝時輩棲息無何鄉

與道者同守庚申

洞真善救世守夜看僊經俾我外持內當茲申配庚齋
心已恬愉澡身自澂明沉沉簾幃下靄靄燈燭清四支
動用息一室虛白生收視忘趨捨叩齒集神靈伊予嗜

欲寡居常病恙輕三尸既伏竄九藏乃和平無令耳目
勝則使性命傾窅然深夜中若與元氣并釋宗稱定慧
儒師著誠明派分示三教理詣無二名吉祥能止止委
順則生生視履苟無咎天祐期永貞應物智不勞虛中
理自冥豈資金丹術即此駐顏齡

丙寅歲苦貧戲題

清朝起藜床雪霜對枯籬家人來告予今日無晨炊
醯一已罄薪炭固難期厚生彼何人工拙各異宜間歲

從使檄親賓苦川馳雖非悖而入與出常相隨吳門與
南畝頗亦持鎡基有時遇豐年歲計猶不支顏淵諒賢
人陋巷能自怡中憶裴子野泰然傾薄糜愧非古人心
戚戚愁朝飢近古猶不及太上那可希奈何時風扇使
我正性良巧智競憂勞展轉生澆漓吾觀黃金印未勝
青松枝麤麤令有魚菽豈復求輕肥顧慙主家拙甘使羣
下嗤如何致一杯醉後無所知

獨酌

獨酌復獨酌滿盞流霞色身外皆虛名酒中有金德風
清與月朗對此情何極

知非

名教自可樂搢紳貴行道何必學狂歌深山對豐草

誠言

言之或未行前哲所不取方寸雖浩然因之三緘口

醉後

美祿與賢人相逢自可親願將花柳月盡賞醉鄉春

[illegible]

權文公集卷一

欽定四庫全書薈要卷一萬三千七百七

集部

權文公集卷二

唐 權德輿 撰

詩

奉和李相公早朝於中書候傳點偶書所懷奉
呈門下相公中書相公

五更鐘漏歇千門扃鑰開紫薇殘月下黃道曉光來辯
色趨中禁分班列上台祥烟初繚繞威鳳正徘徊斧藻

歸全德輪轅適衆材化成風偃草道合鼎調梅渥命隨
三接皇恩暢九垓嘉言造膝去喜氣沃心迴東閣延多
士南山賦有臺陽春那敢和空此詠康哉

奉和于司空二十五丈新卜城南郊居接司徒
公別墅即事書情奉獻兼呈李裴相公

一德承昌運三公翊至尊雲龍諧理代魚水見深恩別
墅池塘曉晴郊草木蕃溝塍連杜曲茅土盛于門卜築
因登覽經邦每討論退朝鳴玉會入室斷金言材俊依

東閣壺觴接後園
逕深雲自起風靜
葉初翻宰物歸心
匠虛中即化源
巴人寧敢和空此
媿遊藩

奉和新卜城南郊
居得與衛右丞鄰
舍因賦詩
寄贈

上宰坐論道郊居
仍里仁六符既昭
晰萬象隨陶鈞旭
旦下玉墀鳴騶拂
車茵軒窗退殘暑
風物迎蕭辰山澤
蜃雨出林塘魚鳥
馴豈同求羊逕共
是羲皇人石君五
曹重左戶三壤均
居止烟火接逢迎
雞黍頻大方本無

金安四庫全書
卷二
隅盛德必有鄰千年郢曲後復此聞陽春

奉和韋曲莊言懷貽東曲外族諸弟

韋曲冠蓋里鮮原鬱青蔥公台睦中外墅舍隣西東
駟出國門晨曦正瞳矐燕居平外土野服參華蟲
疆畝分古渠烟霞連灌漑長幼序以齒歡言無不同
憶昔全盛時郎郇播休功代業擴宇內光塵藹墟中
慨息多永歎歌詩厚時風小生忝瓜葛慕義思無窮

和王侍郎病中領度支煩迫之餘過西園書堂

閒望

憑檻輟繁務
晴光烟樹分
中邦均禹貢
上藥驗桐君
滿
逕風轉蕙
卷簾山出雲
鏘然玉音發
餘興在新文

奉和度支李侍郎早朝

夙駕趨北闕
曉星啓東方
鳴騶分騎吏
列燭散康莊
照
灼華簪並逶迤
綺陌長
腰金初辯色
噴玉自生光
獻替
均三壤
貞明集
百祥下才叨接武
空此媿文昌

奉和劉侍郎司徒奉詔伐叛書情呈宰相

玉帳元侯重黃樞上宰雄緣情詞律外宣力廟謨中震
耀恭天討嚴凝助歲功行看畫麟閣凜凜有英風

奉和鄜州劉大夫麥秋出師遮虜有懷中朝親
故

天子愛全才故人雄外臺綠油登上將青綬亞中台亭
障鳴笳入風雲轉旆來蘭防分杳杳麥壠望莓莓月向
琯弓滿蓮依寶劍開行師齊鶴列錫馬盡龍媒壯志徵
梁甫嘉招萃楚材千尋推直幹百鍊去纖埃間闊勞相

望歡言幸早陪每聯花下騎幾泛竹間杯芳訊雙魚遠
流年兩鬢催何時介圭覲攜手詠康哉

太原鄭尚書遠寄新詩走筆酬贈因代書賀

曉開閭闔出絲言共喜全才鎮北門職重油幢推上畧
榮兼革履見深恩昔歲經過同二仲登朝並命慙無用
曲臺分季奉齋祠直筆繫年陪侍從芬芳雞舌向南宮
伏奏丹墀跡又同公望數承黃紙詔虛懷自號白雲翁
戎裝蹀躞紛出祖金印煌煌寵司武時看介士閱犀渠

每狎儒生冠章甫晉祠汾水古并州千騎雙旌居上頭
新握兵符應感激遠緘詩句更風流緇衣諸侯諒稱美
白衣尚書何可比只今麟閣待丹青努力加餐報天子
奉和許閣老酬淮南崔十七端公見寄

文行蘊良圖聲華挹大巫掄才超粉署駁議在黃樞自
得環中辨偏推席上儒八音諧雅樂六轡騁康衢密侍
金鏘珮雄才本棄繻鑪烟霏瑣闥宮漏滴銅壺舊友雙
魚至新文六義敷斷金揮麗藻比玉詠生菊交辟嘗推

重單辭忽受誣風波疲賈誼岐路泣楊朱溟漲前程險
炎荒旅夢孤空悲鳶跼水翻美鴈銜蘆故國方迢遞羈
愁自鬱紆遠猷來象魏霈澤過番禺盡室扁舟客還家
萬里途索居因仕宦著論擬潛夫帆席來應駛郊園半
已蕪夕陽尋井逕涼吹動纖枯憶昔同馳傳忘懷或據
梧幕庭依古剎緡稅給中都瓜步經過慣龍沙眺聽殊
春山嵐漠漠秋渚露塗塗

德興建中興元之間與崔同為鹽鐵邑大夫從事楊子既

濟寺貞元初德興受辟於江西廡崔又知度支院在焉

孰謂原思病非關甯武愚

方看簪獬豸俄嘆繫駒駉芳訊風情在佳期歲序徂二
賢歡最久三益義非無栢悅心應爾松寒志不渝子將
陪禁掖亭伯限江湖交分終推轂離憂莫向隅分曹日
相見延首憶田蘇

奉和李給事省中書情寄劉苗崔三曹長因呈
許陳二閣老

常寮幾處伏明光新詔聯翩夕拜郎五夜漏清天欲曙
萬年枝暖日初長分曹列侍登文石促膝閑謠接羽觴

共說漢朝榮上賞
豈令三友滯馮唐

過張監閣老宅對酒奉酬見贈

其年停貢舉

里仁無外事徐步一開顏
荆玉收難盡齊竽喜暫閑
秋風傾菊酒霽景下蓬山
不用投車轄甘從倒載還

奉和張舍人閣老閣中直夜思聞雅琴因以書事通簡僚友

紫垣宿清夜藹藹復沉沉
圓月銀漢淨好風松滌深
軒窗韻虛籟蘭雪懷幽音
珠露銷暑氣玉微結遐心
盛才

本殊倫雅誥方在今佇見舒彩翮翻飛鳳歸林

和兵部李尚書東亭詩

三接履聲退東亭斯曠然風流披鶴氅操割佩龍泉雲
卷巖巘疊雨餘松桂鮮豈煩禽尚遊所貴天理全

和司門殷員外早秋省中書直夜寄荆南衛象

端公

共嗟王粲滯荊州才子為郎憶舊遊涼夜偏宜粉署直
清言遠待玉人酌風生北渚烟波闊露下南宮星漢秋

早晚得為同舍侶知君兩地結離憂

酬陸三十二叅浙東見寄

驄馬別已久鯉魚來自烹慙懃故人意悵悵中林情
范重江外杳杳一枝瓊搔首望良覲為君華髮生

奉酬張監閣老雪後過中書見贈加兩韻簡南

省僚舊

寓直久叨榮新恩倍若驚風清五夜永節換一陽生
潘鬢年空長齊竿藝本輕常時望連茹今日劇懸旌枉步

歡方接含毫思又縈煩君白雪句歲晏若為情

酬主客仲員外見賀正除

五年承乏奉如綸才薄那堪侍從臣禁署獨聞清漏曉
命書慙對紫泥新周班每喜簪裾接郢曲偏宜諷詠頻
憶昔曲臺當議禮見君論著最相親

奉和太府韋卿閣老左藏庫中假山之作

春山仙掌百花開九棘腰金有上才忽向庭中摹峻極
如從洞裏見昭回小松已負千霄狀片石皆疑縮地來

都內今朝似方外仍傳麗曲寄雲臺

奉和崔評事寄外甥劉同州并呈杜賓客許給
事王侍郎昆弟楊少尹李侍御并見寄之作

芳訊來江湖開緘粲瑤碧詩因乘黃贈才擅雕龍格深
陳名教本諒以仁義積藻思成采章雅音聞皦繹清時

左馮翊貴士二千石前日應星文今茲敞華戟謝公嘗

乞墅

乞音氣

甯氏終相宅往歲疲草玄忘年齊舉白酒酣

吟更苦夜艾談方劇棗巷風雨秋石頭烟水夕多逢長

者輒不屑諸公辟酷似仰牢之雄詞挹亭伯老驥念千里飢鷹舒六翮巨能捨郊扉來偶朝中客

和職方殷郎中留滯江漢初至南宮呈諸公并

見寄

十歲別文昌藩符寄武當師貞上介辟恩擢正員郎藻

思烟霞麗歸軒印綬光

頃佐山南
榮加章服

還希駐輦問莫自歎

馮唐

奉酬從兄南仲見示十九韻

晉季天下亂安丘佐關中德輝靄家牒侯籍推時功簪
纓盛西州清白傳素風逢時有舒卷繕性無窮通吾兄
挺奇資向晦道自充耕鑿汝山下退然安困蒙詩成三
百篇儒有一畝宮琴書滿座右芝朮生牆東麗藻粲相
鮮晨輝艷芳藂清光杳無際皓魄流霜空邦有賢諸侯
主盟詞律雄薦賢比文舉理郡邁文翁樓中賞不獨池
畔醉每同聖朝闢四門發跡貴名公小生何為者往歲
學雕蟲華簪映武弁一年被微躬開緘捧新詩瓊玉寒

青蔥謬進空內訟結懷遠忡忡時來無自疑刷翮摩蒼
穹

酬崔千牛四郎早秋見寄

浩歌坐虛室庭樹生涼風碧雲滅奇彩白露萎芳叢感
此時物變悠然遐想通偶來被簪組自覺如池龍少年
才藻新金鼎世業崇鳳文已彪炳瓊樹何青蔥聯鑣長
安道接武承明宮君登玉墀上我侍彤庭中疲病多內
愧切磋常見同起予覽新詩逸韻凌秋空相愛每不足

因茲寓深衷

酬靈徹上人以詩代書見寄

時在薦福寺坐夏

蓮花出水地無塵中有南宗了義人已取貝多翻半字
還將陽燄諭三身碧雲飛處詩偏麗白月圓時信本真
更喜開緘銷熱惱西方社裏舊相親

酬蔡十二博士見寄四韻

蕪城十年別蓬轉居不定終歲白屋貧獨謠清酒聖風
塵韋帶減霜雪松心勁何以浣相思啟元能盡性

君著周易

啟元
十卷

戲和三韻

墨翟突不黔范丹甌生塵君今復勞歌鶴髮吹濕薪前

詔許真秩何如巾軟輪

君貞元十一年以隱君拜命詔書令州府給傳乘詣闕到日授

正官

李十韶州寄途中絕句使者取報修書之際口

號酬贈

詔下忽臨山水郡不妨從事恣攀登莫言向北千行雁

別有圖南六月鵬

崔四郎協律以詩見寄兼惠蜀琴因以酬贈

臨風結煩想客至傳好音
白雪絨郢曲朱絃亘蜀琴
泠泠響幽韻欵欵寄遐心
晚歲何以報與君期斷金

酬馮絳州早秋絳臺感懷見寄

良牧閒無事層臺思眇然
六條榮印綬三晉辯山川
洗幘謳謠合開襟眺聽偏
秋光連大鹵霽景下新田
葉落徑庭樹人歸曲沃烟
武符頌美化亥字訪疑年
經術推

多識卿曹亦累遷齋祠常並冕官品每差肩按部青絲
騎裁詩白露天知音愧相訪商洛正閒眠

酬趙尚書杏園花下醉後見寄

時為太常卿

春光深處曲江西八座風流信馬蹄鶴髮杏花相映好
美君終日醉如泥

酬趙尚書城南看花日晚先歸見寄

杜城韋曲遍尋春處處繁花滿目新日暮歸鞍不相待
與君同是醉鄉人

權文公集卷二

欽定四庫全書薈要卷一萬三千七百八

集部

權文公集卷三

唐 權德輿 撰

雜詩

伏蒙十六叔寄示喜慶感懷三十韻因獻之

受氏自有殷樹功緬前秦主田接土宇侯籍相紛綸二十

代祖前秦射安丘敬公事具十六國春秋及晉書八代祖周宜昌公七代祖隋鄭城公六代祖皇朝封平涼公

皆以勲庸而受爵土也

道義集天爵菁華極人文握蘭中臺並折

桂東堂春

五代伯祖屯田郎中府君叔祖水部員外郎府君同登省闈事具南宮故事曾王父成都

府君曾祖叔梓州府君長安府君同以進士居甲科載在登科記之內也

祖德蹈前哲家風

播清芬

王父右羽林錄事席君與席文公建侯友善又與蘓司業源明包著作融為文章之友唱酬往

復各有文集

先公秉明義大節逢艱屯獨立挺忠孝至誠感

神人命書備追錫跡遠道不伸小生諒無似積慶遭昌

辰九年西掖忝五轉南宮頻司理因曠職曲臺仍禮神

愧非夔龍姿忽佐堯舜君內惟負且乘徒以弱似仁豈

足議大政所憂玷彛倫叔父貞素履含章窮典墳百氏

若珠貫九流皆翬分黃鍾蘊聲調白玉那縉磷清論坐
虛色長謠宜幅巾開闕接人祠支榮無俗賓種杏當暑
熟烹茶含露新井徑交碧鮮軒牕棲白雲飛沉禽魚樂
芬馥蘭桂薰經術弘義訓息男茂嘉聞筮仕就色養宴
居忘食貧四方有趨車上國有蒲輪行當反招隱豈得
常退身秦吳路杳杳朔晦望沄沄待坐馳夢寐結懷積
昏昕發函捧新詩慈誨情殷勤省躬日三復拜首書諸
紳

酬李二十二兄主簿馬跡山見寄

并序

族內兄暢純靜而深直方而文與予同偶居丹陽丹陽
郭北四十里所有馬跡山山有奇峯怪石且多昔賢真
僊之所游踐方外士殷渙然通易經老嚴之旨居於山
下從舅原均探異好古亦往來棲息其間貞元元年兄
以典校秘書調補江陵松滋主簿以地遠不就職予以
環衛冗秩罷漕輓從事且久家居食貧里巷相接其明
年兄命駕遊此山予以疾故不克偕往既而猥辱鍾陵

檄召兄自山中以詩一首見貽理精詞達清滌心府三
復其文如至山下終篇則戲以出處之跡見誚故予復
之於此章仍加六十字以就全數

杳杳塵外想悠悠區中緣如何戰未勝曾是教所牽遠
郊有靈峯夙昔棲真僊鸞聲去已久馬跡空依然丹崖
轉初旭碧落凝秋烟松風共蕭颯蘿月想嬋娟內兄蘊
遐心嘉遯性所便不能棲枳棘且復探雲泉中有冥寂
人閑讀逍遙篇聯袂共交榮樞衣嘗絕編徐行石上苔

靜韻風中絃烟霞濕儒服日月生寥天新詩來起予瓊
璨六義全能盡含寫意轉令山水鮮若聞笙鶴聲宛在
耳目前登攀阻心賞愁絕空懷賢出處豈異途心冥即
真筌覽從西府檄終卧東菑田不嫌予步蹇但恐君行
羶如能固曠懷谷口期窮年

酬陸四十楚源春夜宿虎丘山對月寄梁四敬
之兼見貽之作

東風變薊薄時景日妍和更想千峯夜浩然幽意多蕙

香襲閑趾松露泣喬柯潭影漾霞月石床封薜蘿夫君
非歲時已負青冥姿龍虎一門盛淵雲四海推駸駸步
騁褻婉婉翥長離玄圃盡瓊樹家林輕桂枝聲榮徒外
獎恬淡方自適逸氣凌顥清仁祠訪金碧芊眠瑤草秀
斷續雲竇滴芳訊發幽緘新詩比良覲故人石渠署美
價滿中朝落落杉松直芬芬蘭杜飄雄詞鼓溟海曠度
豁烟霄營道幸同術論心皆後凋循環伐木詠緬邈招
隱情慙茲擁腫才愛彼潺湲清拘牽尚多故夢想何由

并終結方外期不待華髮生

酬穆七侍郎早登使院西樓感懷

耿耿宵欲半振衣庭戶前浩歌撫長劍臨風泛清絃晴
霜麗寒蕪微月露碧鮮杉梧韻幽籟河漢明秋天良夜
雖可翫沉憂逾浩然樓中遲啟明林際揮宿烟晨風響
鐘鼓曙色映山川滔滔天江駛杲杲朝日懸困窮西南
永得見天地全動植相糾紛車從競喧闐鱸鮓躍洪流
麇麇倚荒阡嗷嗷白雲雁嘒嘒清露蟬一氣鼓萬殊晦

明相推遷義和無停軌不得常少年當令志氣神及此
鬢髮玄豈唯十六族今古稱其賢夫君才氣雄振藻何
翩翩詩輕沈隱侯賦擬王仲宣小鳥搶榆枋大鵬激三
千與君期晚歲方結林棲緣

奉和李大夫題鄭評事江樓

達士無外累隱几依南郭茅棟上江開布帆當砌落支
頤散華髮歌枕曝靈藥入鳥不亂行觀魚還自樂何時
金馬詔早歲建安作往事盡筌蹄虛懷寄杯杓邦君駐

千騎清論時，間酌憑檻出。烟埃振衣，向寥廓心源齊。彼
是人境勝巖壑，何必棲冥冥，然為避增綴。

春遊茅山酬杜評事見寄

喜得賞心處，春山豈計程。連溪芳草合，半嶺白雲晴。絕
澗漱冰碧，仙壇挹顥清。懷君在人境，不共此時情。

和韓侍御白髮

白髮今朝見，虛齋曉鏡清。乍分霜簡色，微映鐵冠生。幕
下多能事，周行挹令名。流年未可歎，正遇太階平。

和邵端公醉後寄于諫議之作

莫羨簷前柳春風獨早歸陽和次第發桃李更芳菲

和李大夫西山祈雨因感張曲江故事十韻

亞相冠貂蟬分憂統十聯火星當永日雲漢倬炎天齋
禱期靈貺精誠契昔賢中宵出騶馭清夜旅牲牷觸石
看初起隨車應物先雷音生絕巘雨足晦平阡瀟灑四
冥合空濛萬頃連歌謠誼澤國稼穡遍原田故事三台
盛新文六義全作霖應自此天下待豐年

同陸太祝鴻漸崔法曹載華見蕭侍御留後說
得衛撫州報推事使張侍御却迴前刺史戴
員外無事喜而有作三首

專城書素至留臺忽報張網攬轡迴共看昨日蠅飛處
併是今朝鵲喜來

鶴髮州民擁使車人人自說受恩初如今天下無冤氣
乞為邦君雪謫書

衆人哺啜喜君醒渭水由來不雜涇遮莫雪霜撩亂下

松枝竹葉自青青

答韋秀才寄一首

中峯雲暗雨霏霏
水漲花塘未得歸
心憶瓊枝望不見
幾迴虛濕薜蘿衣

戶部王曹長楊考功崔刑部二院長並同鍾陵
使府之舊因以寄贈又陪郎署喜甚常僚因
書所懷且叙所知

忽驚西江侶共作南宮郎
宿昔芝蘭室今茲鴛鴦行
子

猷美風味左戶推公器含毫白雪飛出匣青萍利子雲

嘗燕居作賦似相如閒成考課奏別貢賢良書子玉諒

貞實持刑慎丹筆秋天鴻鵠姿晚歲松筠質伊予誠薄

才何幸復趨陪偶來塵右掖空此憶中臺時節東流駛

悲歡追往事待月登庾樓排雲上蕭寺盍簪蓮府讌落

帽龍沙醉極浦送風帆靈山眺烟翠解頤通善謔喻指

窮精義搦管或飛章分曹時案吏雨散與蓬飄秦吳兩

寂寥方期全擁腫豈望躡扶搖夜直分三署晨趨共九

霄外庭時接武廣陌更連鑣北極星辰拱南薰氣序調
欣隨衆君子並立聖明朝

貢院對雪以絕句代八行奉寄崔閣老

寓宿春闈歲欲除嚴風密雪絕雙魚思君獨步西垣裏
日日含香草詔書

初秋月夜中書宿直因呈楊閣老

歌枕直廬暇風蟬迎早秋沉沉玉堂夕皎皎金波流對
掌喜新命分曹諧舊遊相思翫華彩因感庾公樓

唐開州文編遠寄新賦累惠良藥咏嘆仰佩不
覺斐然走筆代書聊書還答

風雨竦庭柯端憂坐空堂多病時節換所思道里長故
人朱兩轡出自尚書郎下車今幾時理行遠芬芳瓊瑤
覽良訊茱萸滿素囊結根在貴州蠲疾傳古方探擷當
五月殷勤逾八行深情婉如此善祝何可忘復有金玉
音煥如龍鳳章一聞靈洞說若覩羣仙翔三清飛慶霄
百汰成雄鉅體物信無對灑心願相將昔年同旅食終

日窺文房春風眺蕪城秋水渡柳楊君為太史氏弱質
羈楚鄉今來忝司諫千騎遙相望歸雲夕鱗鱗圓魄夜
蒼蒼遠思結鈴閣何人交羽觴佇見徵潁川無為薄淮
陽政成看再入列侍爐烟傍

待漏假寐夢歸江東舊居

十年江浦卧郊園閒夜分明結夢魂舍下烟蘿通古寺
湖中雲雨到前軒南宗長老知心法東郭先生識化源
覺後忽聞清漏曉又隨簪佩入君門

祇命赴京途次淮口因書所懷

弱植素寡偶，趨時非所任。
感恩再登龍，求友皆斷金。
彪炳覩奇采，淒鏘聞雅音。
適欣佳期接，遽歎離思侵。
靡靡遵遠道，忡忡勞寸心。
難成獨酌謠，空奏伐木吟。
泒寥清冬時，蕭索白晝陰。
交歡諒如昨，滯念紛在今。
因風試矯翼，倦飛會歸林。
向晚清淮駛，迴首楚雲深。

省中春晚忽憶江南舊居戲書所懷因寄兩浙

親故雜言

前年冠獬豸戎府隨賓介去年簪進賢贊導法宮前今
茲戴武弁謬列金門彥問我何所能頭冠忽三變野性
慣疎閒晨起興暮還花時限清禁霽後愛南山晚景支
頤對樽酒舊遊憶在江湖久庾樓柳寺共開襟楓岸烟
塘幾攜手結廬常占練湖春猶寄藜床與幅巾疲羸只
欲思三徑慙直那堪備七人更想東南多竹箭縣圃琅
玕共葱蒨裁書且附雙鯉魚偏恨相思未相見

寄李衡州

時所居即
衡州宅

片石叢花畫不如
庇身三逕豈吾廬
主人千騎東方遠
唯望衡陽鴈足書

寄臨海郡崔穉璋

美酒步兵厨
古人嘗宦遊
赤城臨海嶠
君子今督郵
吏隱豐暇日
琴壺共冥搜
新詩寒玉韻
曠思孤雲秋
志士誠勇退
鄙夫自包羞
終當就知己
莫戀潺湲流

李韶州著書常論釋氏之理
貴州有能公遺跡
詩以問之

當日區中暇時聞象外言曹溪有宗旨一為勘心源

馬上贈虛公

馬足早塵深飄纓又滿襟吾師有甘露為洗此時心

郴州換印緘遣之際率成三韻因寄李二兄員

外使君

緘題桂陽印持寄朗陵兄刺舉官猶屈風謠政已成行
看換龜組奏最謁承明

早發杭州泛富春江寄陸三十一公佐

候曉起徒馭春江多好風白波連青雲蕩漾晨光中四
望浩無際沉憂將此同未離奔走途但恐成悲翁俯見
觸餌鱗仰目凌霄鴻纓塵日已厚心累何時空區區此
人世所向皆樊籠唯應杯中物醒醉為窮通故人玄圃
姿瓊樹紛青蔥終當此山去共結蘭桂叢

寄侍御從舅

初免職
歸山東

靡靡南軒蕙迎風轉芳滋落落落幽澗松百尺無附枝世
物自多故達人心不羈偶陳幕中畫未負林間期感恩

從慰薦循性難紮維野鶴無俗質孤雲多異姿清冷松
霜泣照灼巖花遲終當秣塵駕來就東山嬉

湖上晚眺呈惠上人

湖上烟景好鳥飛雲自還幸因居止近日覺性情閒獨
酌乍臨水清機常見山此時何所憶淨侶話玄關

新秋月夜寄故人

客心宜靜夜月色澹新秋影落三湘水詩傳八詠樓何
窮對酒望幾處捲簾愁若問相思意隨君萬里遊

自楊子歸丹陽初遂閒居聊呈惠公

移疾喜無事
卷簾松竹寒
稍知名是累
日與靜相歡
寔淺逢機少
迂踈應物難
只思閒夜月
共向沃州看

月夜過靈徹上人房因贈

此身會逐白雲去
未洗塵纓還自傷
今夜幸逢清淨境
滿庭秋月對支郎

戲贈張鍊師

月帔飄颻摘杏花
相邀洞口勸流霞
半酣乍奏雲和曲

疑是龜山阿母家

戲贈天竺靈隱二寺寺主

石路泉流兩寺分
尋常鐘磬隔山聞
山僧半在中峯住
共占青巒與白雲

贈廣通上人

身隨猿鳥在深山
早有詩名到世間
客至上方留盥漱
龍泓洞水晝潺潺

贈老將

白草黃雲塞上秋曾隨驃騎出并州
轆轤劍折虬鬚白
轉戰功多獨不侯

權文公集卷三

欽定四庫全書薈要卷一萬三千七百九

集部

權文公集卷四

唐 權德輿 撰

詩

奉送韋起居老舅百日假滿歸嵩陽舊居

威鳳翔紫氣孤雲出寥天
奇采與幽姿縹緲皆自然
嘗聞陶唐氏亦有巢由全
以茲聳風俗豈必效羈牽
大君遂羣方左史蹈前賢
振衣去朝市賜告歸林泉
滑和固

難久循性得所便有名皆畏途無事乃真筌舊壑窮香
窅新潭漾淪漣巖花落又開山月缺復圓輕策逗蘿逕
幅巾凌翠烟機閒魚鳥狎體和芝朮鮮四皓本違難二
疏猶待年況今寰海清復此鬢髮玄頽慙纓上塵未絕
區中緣齊竽終自退心寄嵩峯巔

奉送孔十兄賓客承恩致政歸東都舊居

達人曠迹通出處每憶安居舊山去乞身已見抗疏頻
優禮新聞詔書許家法遙傳闕里訓心源早遂高丘侶

南史編年著盛名東朝侍講常虛佇角中華髮忽自遂
命服金龜君更與白雲出岫暫逶迤鴻鵠入冥無處所
歸路依依童稚樂都門藹藹壺觴舉能將此道助皇風
自可殊途並伊呂

送密秀才吏部駁放後歸蜀應崔大理序

蜀國本多士雄文似相如之子西南秀名在賢能書薄
祿且未及故山念歸歟迢迢三千里返駕一羸車玉壘
長路盡錦江春物餘此行無愠色知爾戀林廬

送袁中丞持節冊南詔五韻

淨字

西南使星去遠徹通朝聘烟雨棘道深麾幢漢儀盛
逶輕五尺險水愛雙流淨上國洽恩波外臣遵禮命離
堂駐驪馭且盡罇中聖

人日送房二十六侍御歸越

驛騎歸時驄馬蹄蓮花府映若耶溪帝城人日風光早
不惜離堂醉似泥

送張閣老中丞持節冊吊回鶻

旌旆翩翩擁漢官君行常得遠人歡
分職南臺知禮重
輟書東觀見才難
金章玉節鳴騶遠
白草黃雲出塞寒
欲散別愁惟有醉
暫煩賓從駐征鞍

送二十叔赴任餘杭尉

琴字

拜首直城陰
罇開意不任
梅仙歸劇縣
阮巷奏離琴
春草吳門綠
秋潮浙水深
十年曾旅寓
應慙宦遊心

奉送十四叔赴任渝州錄事絕句

中字

隨牒忽離南北巷
解巾都吏有清風
巴城鑠印六聯靜

盡日間謠解署中

送韋十二丈赴襄城令三韻

柳字

留連出關騎斟酌臨岐酒舊業傳一經新官裁五柳去
去望行塵青門重回首

送薛十九丈授將作主簿分司東都賦得春草
芊芊遠郊外杳杳春巖曲愁處映微波望中連淨綠日
暮藉離觴折芳心斷續

送正字十九兄歸江東醉後絕句

命駕相思不為名春風歸騎出關程離堂莫起臨歧歎
文舉終當薦禰衡

送張詹事致政歸嵩山舊隱

青字

解龜辭漢庭却憶少微星直指常持憲平反更恤刑閒
思紫芝侶歸卧白雲扃明詔優筋力安車適性靈羣公
來謁謁獨鶴去冥冥想到揮金處嵩吟枕上青

送許著作分司東都

月旦繼平輿風流仕石渠分曹向瀍洛守職正圖書棣

萼榮相映瓊枝色不如賓朋爭漉酒徒御待巾車異日
始離抱維思烹鯉魚

送少清赴潤州叅軍因思練舊居

得潮字

二紀樂簞瓢烟霞暮與朝因君宦遊去記得春江潮遠
別更搔首初官方折腰青門望離袂魂為阿連銷

送濬上人歸揚州禪智寺

蒙露宗通法已傳麻衣節杖去悠然揚州後學應相待
遙想旛花古寺前

獻歲送李十兄赴黔中酒後絕句

一罇歲酒且留歡
三峽黔江去路難
志士感恩無遠近
異時應戴惠文冠

送張僕射朝見畢歸鎮

青光照目青門曙
玉勒琤戈擁駟馭
東方連帥南陽公
文武吉甫如古風
獨奉新恩來謁帝
感深更見新詩麗
共看三接欲為霖
却念百城同望歲
雙旌去去戀儲胥
歸路鶯花伴隼旗
今日漢庭求上略
留侯自有一編書

送韋行軍員外赴河陽

五代武弁侍明光
輟佐中權拜外郎
記事還同楚倚相
傳經遠自漢扶陽
離堂處處羅簪組
東望河橋壯鼙鼓
三城曉角啟軒門
一縣繁花照蓮府
上畧儒風並者稀
翩翩騶騎有光輝
只今右職多虛位
應待他時伏奏歸

送韋中丞奉使新羅

往字

淳化洽聲明殊方
均惠養計書重譯
至錫命雙旌往星
辭北極遠水泛東
溟廣斗柄辯霄程
天琛宜畫賞孤光

洲岳迥淨綠烟霞敞展禮盛賓徒交歡覲君長經途勞
視聽愴別縈夢想延頸旬歲期新恩在歸鞅

送從翁赴任長子縣令

家風本鉅儒吏職化雙鳧啟事才方愜臨人政自殊地
雄韓上黨秩比魯中都拜首春郊夕離盃莫向隅

送從弟廣東歸絕句

夏雲如火鏢晨輝款段羸車整素衣知爾業成還出谷
今朝莫愴斷行飛

送王鍊師赴王屋洞

稔歲在芝田歸程入洞天白雲辭上國青鳥會羣仙自
以基銷日寧資藥駐年相看話離合風馭忽泠然

送薛溫州

驚字

昨日饋連營今來刺列城方期建禮直忽訪永嘉程郡
內裁詩暇樓中遲客情憑君減千騎莫遣海鷗驚

送黔中裴中丞閣老赴任

迴字

五諫留中禁雙旌輟上才內臣持鳳詔天廐錫龍媒宴

語睽蘭室輝榮亞柏臺懷黃宜命服舉白歎離杯景霽
山川迴風清霧露開辰溪分浩渺棘道接縈迴勝理環
中得殊珍徼外來行看旬歲詔傳慶在公台

送崔諭德致政東歸

天子坐法宮詔書下江東懿此嘉遯士蒲車赴丘中褐
衣入承明朴畧多古風直道侍太子昌言沃宸聰巖居
四十年心與鷗鳥同一朝受恩澤自說如池龍乞骸歸
故山累疏明深衷大君不奪志命錫忽以崇旭日出國

門輕裝若秋蓬家依白雲嶠手植丹桂叢竹齋引寒泉
霞月相玲瓏曠然解赤綬去逐冥冥鴻

送三十叔赴任晉陵

心字德興舊居在丹陽去晉陵百里

春雲結暮陰侍坐捧離襟黃綬輕裝去青門芳草深十
年塵右職三逕寄遐心便道停橈處應過舊竹林

送安南裴都護

忽佩交州印初辭列宿文莫言方任遠且貴主憂分迴
轉朱鳶路連飛翠羽羣戈船航漲海旌旆卷炎雲絕徼

塞帷識名香夾轂焚懷來通北戶長養洽南薰暫歎同
心阻行看異績聞歸時無所欲意或煩君

送別院汎

念爾強學殖非貫早從師溫溫稟義方慥慥習書詩計
偕來上國宴喜方怡怡經術既修明藝文亦歲蕤伊予
諒無取瑣質荷鴻慈偶來貳儀曹量力何可支廢業固
相受避嫌誠自私徇吾刺促心婉爾康莊姿古人貴直
道內訟乖坦夷用茲處大官無乃玷清時羸車出門去

悵望交涕洟琢磨貴分陰歲月若飈馳千里起足下豐
年繫鉉錡苟令志氣堅佇見纓珮隨斑斕五綵服前路
春物熙舊遊憶江南環堵留蓬茨湖水白於練尊羹細
若絲別來十三年夢寐時見之寵榮忽踰量荏苒不自
知晨興愧華簪止足為靈龜遐路各自愛大來行可期
青冥在目前努力調羽儀

送工部張曹長大夫奉使西蕃

殊隣覆露同奉使小司空西候車徒出南薰節印雄弔

祠將渥命導驛暢皇風故地山河在新恩玉帛通寒雲
凝廢壘闕月照驚蓬青史書歸日翻輕五利功

九華觀宴餞崔十七叔判官赴義武幕兼呈書

記蕭校書

炎光三伏晝洞府宜幽步宿雨潤芝田鮮風搖桂樹陰
陰臺殿敞靡靡軒車駐晚酌臨水情晨裝出關路偏榮
本郡辟倍感元臣遇記室有門人因君達書素

送文暢上人東遊

桑門許辯才外學接宗雷護法麻衣淨翻經貝葉開宗
通知不染妄想自堪哀或結西方社師遊早晚回

送靈武范司空

上畧在安邊吳鉤結束鮮三公臨右地七萃擁中堅舊
壘銷烽火新營辯井泉代謀師以律賈勇士爭先塞迥
晴看月沙平遠際天榮勳知屈指應在盛秋前

送商州杜中丞赴任

安康地里接商於帝命專城摠賦輿夕拜忽辭青瑣闥

晨裝獨捧紫泥書
深山古驛分騶騎
芳草閑雲逐隼旟
綺皓清風千古在
因君一為謝巖居

送殷卿罷舉歸淮南舊居

計偕十上竟無成
忽憶巖居便獨行
志業嘗探絕編義
風塵虛作棄繻生
歲儲應歎山田薄
里社時逢野醞清
惆悵中年羣從少
相看欲別倍關情

權文公集卷四

欽定四庫全書薈要卷一萬三千七百十

集部

權文公集卷五

唐 權德輿 撰

雜詩

送杜尹赴東都

商於留異績河洛賀新遷
朝選吳公守時權杜尹賢
如綸披鳳詔出匣淬龍泉
風雨交中土簪裾敞別筵
清明人比玉照灼府如蓮
佇報司州政徵黃似潁川

送孔江州

九派尋陽郡分明似畫圖
秋光連瀑布晴翠辨香爐
才子厭蘭省邦君榮竹符
江城多暇日能寄八行無

送渾鄧州

年少守南陽新恩印綬光
輕軒出繞雷利刃發干將
風勁初下葉雲寒方護霜
想君行縣處露冕蒔潭香

涌橋連奚四于十九陳大三
侍御夜宴叙各賦

二韻

滿樹鐵冠瓊樹枝
樽前燭下心相知
明朝又與白雲遠
自古河梁多別離

酬別蔡十二見贈

伊人茂天爵恬澹卧郊園
傲世方隱几說經久
顓門浩歌曳柴車詎羨
丹轂尊嚴霜被鶉衣
不知狐白溫遊心
義文際愛我相討論
汙潢忽朝宗傳騎令
載奔崢嶸歲陰晚
愀愴離念繁別館絲
桐清寒郊烟雨昏中
飲見逸氣縱談窮化
元佇見公車起聖代
待乞言

揚州與丁山人別

將軍易道令威仙
華髮清談得此賢
惆悵今朝廣陵別
遼東後會復何年

送台州崔錄事

不嫌臨海遠微祿
代躬耕古郡紀綱
職扁舟山水程詩
因琪樹麗心與瀑
泉清盛府知音在
何時薦政成

送信安劉少府

自常州參軍選授

相看結離念盡此
林中綠夷代輕遠
遊上才隨薄祿叅

卿滯孫楚隱市同梅福吏散時泛弦賓來間覆局襟情
無俗慮談笑成逸躅此路足灘聲羨君多水宿

送李城門罷官歸嵩陽

城門院在
遺補院東

與君相識處吏隱在墻東啓閉千門靜逢迎兩掖通罷
官多暇日肄業有儒風歸去塵寰外春山桂樹叢

送上虞丞

越郡佳山水菁江接上虞計程航一葦試吏佐雙鳬雲
壑窺仙籍風謠驗地圖因尋黃絹字為我弔曹盱

送盧評事婺州省覲

知向東陽去晨裝見綵衣客愁青眼別家喜玉人歸漢
漠水烟晚蕭蕭楓葉飛雙溪泊船處候吏拜胡威

送崔端公郎君入京覲省

已見風姿美仍聞藝業勤清秋上國路白晳少年人帶
月輕帆疾迎霜綵服新過庭若有問一為說漳濱

送張周二秀才謁宣州薛侍郎

儒衣兩少年春棹轂溪船湖月供詩興嵐風費酒錢上

帆涵浦岸歌枕傲晴天不用愁羈旅宣城太守賢

送張將軍歸東都舊業

功名不復求舊業向東周白草辭邊騎青門別故侯摧
殘寶劍折羸病綠珠愁日暮寒風起猶疑大漠秋

送句容王少府簿領赴上都

上國路綿綿行人候曉天離亭綠綺奏鄉樹白雲連江
露濕征袂山鶯宜泊船春風若為別相顧起樽前

送從弟謁員外叔父迴歸義興

異鄉兄弟少見爾自依然來酌林中酒去耕湖上田何
朝逢暑雨幾夜泊漁烟餘力當勤學成名貴少年

送梁道士謁壽州崔大夫

年少一僊官清羸駕綵鸞洞宮雲渺渺花路水漫漫歲
計芝田熟晨裝月帔寒遙知小山桂五馬待邀歡

送鄭秀才貢舉

西笈意如何知隨貢舉科吟詩向月露驅馬出烟蘿晚
色平蕪遠秋聲候雁多自憐歸未得相送一勞歌

送謝孝廉移家越州

家承晉太傅身慕魯諸生又見一帆去共愁
千里程沙平古樹迴潮滿曉江晴從此幽深
去無妨隱姓名

送韓孝廉侍從赴舉

貢士去翩翩如君最少年綵衣行不廢儒服
代相傳曉月經淮路繁陰過楚天清談遇知
已應訪孝廉船

送陸拾遺召赴行在

鵷鷺承新命翻飛入漢庭歌詩能合雅獻納
每論經月

曉蜀江迥猿啼楚樹青
幸因焚草暇書札訪沉冥

送映師還本寺

還歸柳寺去遠遠出人羣
苔甃桐華落山牕桂樹薰
引泉通絕澗放鶴入孤雲
幸許宗雷到清談不易聞

送宇文文府赴官

送君當歲暮斗酒破離顏
車騎擁寒水雪雲凝遠山
且安黃綬屈莫羨白鷗閒
從此圖南路青雲步武間

送岳州溫錄事赴任

解中州主簿捧檄不辭遙獨鶴九霄翼寒松百尺條晨
裝沾雨露旅宿候風潮為政閒無事清談肅郡僚

送山人歸舊隱

工為楚辭賦更著魯衣冠歲儉山田薄秋深晨服寒代
人榮燕領志士戀漁竿會被公車薦知君久晦難

惠上人房宴別

方袍相引到龍花支策開襟路不賒法味已同香積會
禮容疑在少施家逸民羽客期皆至疎竹青苔景半斜

究竟相依何處好匡山古社足烟霞

送裴秀才貢舉

儒衣風貌清去抵漢公卿賓貢年猶少篇章藝已成臨
流惜暮景話別起鄉情離酌不辭醉西江春草生

送袁太祝衡婺巡覆

同用山字

校緡稅畝不妨閒清興自隨魚鳥間知君此去足佳句
路出桐溪千萬山

送湖南李侍御赴本使賦採菱亭詩

舊俗採菱處津亭風景和沅江收暮靄楚女發清歌曲
岸縈細葉荒堦上白波蘭橈向蓮府一為枉帆過

送穆侍御歸東都

知君儒服貴綵繡兩相輝婉婉成名後翩翩擁傳歸江
深烟嶼沒山暗雨雲飛共待酬恩罷相將去息機

送崔端公赴度支江陵院三韻

燕字

津亭風雪霽斗酒留征棹星傳指湘江瑤琴多楚調偏
愁欲別處黯黯頽陽照

送陸太祝赴湖南幕同用送字 三韻

不憚征路遙定緣賓禮重新知折柳贈舊侶
乘籃送此去佳句多楓江接雲夢

送李處士歸弋陽山居

限姓名
中用韻

暫來城市意何如却憶葛陽溪上居
不憚薄田輸井稅自將佳句著州閭
波翻極浦檣竿出霜落秋郊樹影疎
想到家山無俗侶逢迎只是坐籃輿

送清江上人謁信州陸員外

暫辭長老去隨緣
候曉輕裝寄客船
佳句已齊康寶月
清談遠指謝臨川
灘經水瀨逢新雪
路過漁潭宿暝烟
暇日若隨千騎出
南巖只在郡樓前

送別同用闊字

三韻

耿耿離念繁蕭蕭涼葉脫
緇塵素衣敝風露秋江闊
想得讀書牕巖花對巾褐

送人使之江陵

賞字

嘉招不辭遠捧檄
利攸徃行役念前程
讌游睽舊賞征

軺星乍動江信潮應上烟水飛一帆霜風搖五兩紛紛
別袂舉切切離鴻響後會杳何時悠然勞夢想

餘干贈別張二十二侍御

蕪城陌上春風別干越亭邊歲暮逢驅車又愴南北路
返照寒江千萬峯

雜言賦得風送崔秀才歸白田限三五六七言

暄字

響深澗思啼猿閣入蘋洲暖輕隨柳陌暄澹蕩乍飄雲

影芳菲遍發
花源寂寞春
江別君處和
烟帶雨送征
軒
離言同用離
騷體送張評
事襄陽覲省

黯離堂兮日
晚儼壺觴兮
送遠遠水霽
兮微明杜蘅
秀兮白芷生
波泫泫兮烟
幕幕凝暮色
於空碧紛離
念兮
隨君泝九江
兮經七澤君
之去兮不可
留五采裳兮
木蘭舟

嶺上逢久別者又別

十年曾一別
征路此相逢
馬首向何處
夕陽千萬峯

贈別表兄韋卿

新讀兵書事護羌腰間寶劔映金章少年百戰應輕別
莫笑儒生淚數行

古離別

人生天地間譬若六轡馳天壽既常數奈何生別離跡
當中人域正性日已衰是非千萬境杳靄情塵滋出門
事何常暫別亦難期冉冉歎流景悠悠限山陂盡此一
夕歡華搏會前墀雞鳴東方曙夙駕臨通達欲出強移

步欲留難致辭兩情不得已念此留何為天明去已遠
寂默居人歸入門復上堂恍恍生驚疑經履同遊處猶
言常相隨覽物或臨盤翻怪來何遲乃知前日歡本為
今日悲持此別後心寧及未見時則知交疎分久又翻
易持報君未別後別後當自知

權文公集卷五

謹案卷一第四頁前二行交泰萬寓平原本寓訛

寓據全唐詩改

第四頁後四行添思煥瓊琚原本脫煥字據全唐

詩增

第五頁後六行翻飛淳化中原本脫飛字據全唐

詩增

第九頁前一行村盤既羅列原本村訛林據全唐

詩改

卷二第一頁後五行即事書情原本書訛舊據全

唐詩改

第三頁後一行宣力廟謨中原本力訛方據全唐

詩改

卷三第一頁後三行與席文公建侯友善原本友

訛有據全唐詩改

第一頁後六行司理因曠職原本司訛角據全唐

詩改


第三頁前二行三復其文原本闕三字據全唐詩補

第七頁前六行又陪郎署原本陪記部據全唐詩改

卷四第一頁前五行歸嵩陽舊居原本歸嵩訛嵩歸今改

卷五第六頁後五行送袁太祝原本袁訛遠據全唐詩改





總校官庶吉士臣侍朝

校對官庶吉士臣陳墉

謄錄監生臣薛翰

欽定四庫全書薈要

集部

權文公集卷六至十



詳校官助教臣常循

欽定四庫全書薈要卷一萬三千七百十一集部

權文公集卷六

唐 權德輿 撰

雜詩

早夏青龍寺致齋憑眺感物因書十四韻

寺壁有畧

氏庶子詩

曉出文昌宮憇茲青蓮宇潔齋奉明祀憑覽傷夏古秦
為三月火漢乃一抔土詐力自湮淪霸業終莽鹵中南



橫峻極積翠洩雲雨首夏諒清和芳陰接場圃仁祠闕
嚴淨稽首洗靈府虛室僧止禪危梁燕初乳通莊走聲
利結駟乃旁午觀化復何如刳心信為愈盛時忽過量
弱質本無取靜永環中樞益愧腰下組塵勞期抖擻陟
降聊俯僂遺韻留壁間淒然感東武

仲秋朝拜昭陵

清秋壽原上詔拜承吉卜嘗讀貞觀書及茲幸齋沐文
皇昔潛耀隋季自顛覆撫運斯順人救焚非逐鹿神祇

戴元聖君父納大麓良將授兵符直臣調鼎餗無疆傳
慶祚有截荷亭育仙馭凌紫氛神遊棄黃屋方祇護山
跡先正陪巖腹杳杳九變深沉沉萬靈肅鳥飛田已闕
龍去雲猶簇金氣爽林巒乾岡走崖谷吾皇弘孝理率
土蒙景福擁祐乃清夷威靈諒回復禮承三公重心愧
二卿祿展敬何所伸曾以斧山木

拜昭陵出城與張秘監閣老同里臨行別承在
史館未歸尋辱清辭輒酬之

仲月當南呂晨裝拜穀林逢君在東觀不得話離襟策
馬緣雲路開絨扣玉音還期終決日里社酒同斟

酬馮監拜昭陵迴途中遇雨見示

之子共乘輶清秋拜上霄

寢宮有上霄門

曙霞迎夙駕零雨濕

迴鑣甘谷行初盡軒臺去漸遙望中猶可辨耘鳥下山
椒

朔旦冬至攝職南郊因書即事

大明南至慶天正朔旦圜丘樂六成文軌盡同堯歷象

齋祠忝備漢公卿星辰列位台光滿金石交音曉奏清
更有觀臺稱賀處黃雲捧日瑞昇平

奉和張監閣老過八陵院題贈杜卿崔員外

崇飾山園孝理深萬方同感聖人心已聞東閣招從事
每向西垣奉德音公府從容談婉婉賓階清切景沉沉
與君跬步如同舍終日相期此盍簪

奉和鄭賓客相公攝官豐陵扈從之作

時充
簿使

五輅導靈輜千夫象繚垣行宮移曉漏綵仗下秋原莫

完希夷理空懷渙汗恩頤神方蹈道傳聖乃尊尊共祝
如山壽俄驚憑几言遐荒七月會彤蜚百靈奔豹尾從
風直鸞旗映日翻塗窮聯法從營騎肅旌門杳靄虞泉
夕淒清楚挽喧不堪程盡處嗚咽望文園

詹事府宿齋絕句

清齋四體泰白晝一室空摧顏有古樹騷屑多悲風

和王祭酒太社宿齋不得赴李尚書宅會戲書

見寄

元禮門前勞引望，勾龍壇下阻歡娛。此時對局空相憶，博進何人更樂輸。

酬裴端公八月十五日夜對月見懷

涼夜清秋半，空庭皓月圓。動搖隨積水，皎潔滿晴天。多病嘉期阻，深情麗曲傳。偏懷賞心處，同望庾樓前。

奉和崔閣老清明日候許閣老交直之際辱裴

閣老書招云與考功苗曹長先城南遊覽獨

行口號因以簡贈

時德輿以疾故有阻追遊

紫禁宿初迴清明花亂開相招直城外遠遠上春臺諫
曹將列宿幾處期子玉深竹與清泉家家桃李鮮折芳
行載酒勝賞隨君有愁疾自無悰臨風一搔首

和張秘監閣老獻歲過將大拾遺因呈兩省諸
公并見示

二賢同載筆久次入新年焚草淹輕秩藏書厭舊編竹
風晴翠動松雪瑞光鮮慶賜行春令從茲佇九邊

酬崔舍人閣老冬至日宿直省中奉簡兩掖閣

老并見示

令節一陽新西垣宿近臣曉光連鳳沼殘漏近雞人白

雪飛成曲黃鐘律應均層霄翔迅羽廣陌駐歸輪清切

晨趨貴恩華夜直頻輟才時所重

九月中楊閣老分命
權知吏部選事

分命

秩皆真

十月中崔閣老正拜本官德輿正
除禮部受命前一日分草詔詞

左掖期連茹

南宮愧積薪九年叨此地迴首倍相親

八月十五日夜瑤臺寺對月絕句

羸女乘鸞已上天仁祠空在鼎湖邊涼風遙夜清秋半

一望金波照粉田

仁祠寺也見後漢書楚王英傳

夏至日作

璿樞無停運四序相錯行寄言赫曦景今日一陰生

二月二十七日社
兼春分端居有懷簡所思者
清晝開簾坐風光處處生
看花詩思發對酒客愁輕
社日雙飛燕春分百轉鶯
所思終不見還是一含情

甲子歲元日呈鄭侍御明府

萬里烟塵合秦吳遂渺然
無人來上國灑淚向新年
世

故看風葉生涯寄海田
屠蘇聊一醉猶賴主人賢

七夕

佳期人不見天上喜新秋
玉珮霑清露香車渡淺流
東西一水隔迢遞兩年愁
別有穿針處微明月映樓

嘉興九月寄丹陽親故

窮年路岐客西望思茫茫
積水曾南渡浮雲失舊鄉
海邊尋別墅愁裏見重陽
草露荷衣冷山風菊酒香
獨謠看墮葉遠日遍秋光
更羨登攀處烟花滿練塘

九日北樓宴集

蕭颯秋風樓上聞
霜風漠漠起陰雲
不見携觴王太守
空思落帽孟參軍
風吟蟋蟀寒偏急
酒泛茱萸晚易醺
心憶舊山何日見
併將愁淚共紛紛

奉陪李大夫九日龍沙宴會

遲字

龍沙重九會千騎
駐旌旗水木秋光淨
絲桐雅奏遲烟
蕪歛暝色霜菊發
寒姿今日從公醉
全勝落帽時

臘日龍沙會絕句

簾外寒江千里色林中罇酒七人期寧知臘日龍沙會
却勝重陽落帽時

嚴陵釣臺下作

絕頂聳蒼翠清湍石磷磷先生晦其中天子不得臣心
靈棲顙氣纓冕猶緇塵不樂禁中卧却歸江上春潛驅
東漢風日使薄者醇焉用化天下特此報故人人知大
賢心不獨私其身弛張有深致耕釣陶天真奈何清風
後擾擾論屈伸交情同市道利欲相紛綸我行訪遺臺

仰古懷逸民
矰繳鴻鵠遠
雪霜松桂新
江流去不窮
山色凌秋旻
人世自今古
清輝照無垠

曉發武陽館即事書情

清晨策羸車
嘲晰聞村雞
行將騎吏親
日與情愛睽
東風變林樾
南畝事耕犁
青菰冒白水
方塘接廣畦
雜英被長坂
野草蔓幽蹊
烏鹵成沃壤
枯株發柔荑
芳樹鶯命雛
深林麋引麂
杳杳途未極
團團日已西
哲士務纓弁
鄙夫戀蓬藜
終當稅塵駕
盥濯依春溪

豐城劍池驛感題

龍劍昔未發泥沙相晦藏
向非張茂先孰辯斗牛光
神物不自達聖賢亦彷徨
我行豐城野慷慨心內傷

奉使宜春夜渡新塗江陵路至黃蘗館路上遇
風雨作

草草理夜裝涉江又登陸
望路殊未窮指期今已促
傳呼戒徒御振轡轉林麓
陰雲擁嵒端霖雨當山腹
震雷如在耳飛電來照目
獸迹不敢窺馬蹄唯務速
虔心若

齋禮濡體如沐浴萬竅相怒號百泉暗奔瀑危梁慮足
跌峻坂憂車覆問我何以然前日受微祿轉知人代事
纓組乃微束向若家居時安枕春夢熟遵途稍已近候
吏來相續曉霽心始安林端見初旭

細柳驛

細柳肅軍令條侯信殊倫棘門乃兒戲從古多其人神
武今不殺介夫如搢紳息駕幸茲地懷哉悚精神

渭水

呂叟年八十瞠然持釣鉤意在靜天下豈唯食營丘師
臣有家法小白猶尊周日暮駐征策愛茲清渭流

宮人斜絕句

一路斜分古驛前陰風切切晦秋烟
鉉華新舊共冥冥
日暮愁鴟飛野田

敷水驛

空見水名敷秦樓昔事無臨風駐征騎聊復將髭鬚

朝元閣

繚垣複道上層霄十月離宮萬國朝胡馬忽來清蹕去
空餘臺殿照山椒

石甕寺

石甕寒泉勝寶井汲人迴挂青絲綆厨烟半逐白雲飛
當晝老僧來灌頂

盤豆驛

盤豆綠雲上古邨望思臺下使人愁江充得計太子死
日暮戾園風雨秋

晚渡楊子江却寄江南親故

返照滿寒流輕舟任搖漾
支頤見千里烟景非一狀
遠岫有無中片帆風水上
天清去鳥滅浦迥寒沙漲
樹晚疊秋嵐江空翻宿浪
胸中千萬慮對此一清曠
回首碧雲深佳人不可望

新安江路

深潭與淺灘萬轉出新安
人遠禽魚淨山深水木寒
嘯起青蘋末吟矚白雲端
即事遂幽賞何心挂儒冠

月夜江行

扣船不得寐，浩露清衣襟。
彌傷孤舟夜，遠結萬里心。
幽興惜瑤草，素懷寄鳴琴。
三奏月初上，寂寞寒江深。

江城夜泊寄所思

客程殊未極，艤棹泊迴塘。
水宿知寒早，愁眠覺夜長。
遠鐘和暗杵，曙月照晴霜。
此夕相思意，搖搖不暫忘。

陪包諫議湖墅路中舉帆

同用山字

蕭蕭涼雨歇，境物望中閒。
風際片帆去，烟中獨鳥還。
斷

橋通遠浦野墅接秋山更喜陪清興樽前一解顏

富陽陸路

又入亂峯去遠程殊未歸煙蘿迷客路山菓落征衣
石臨清淺晴雲出翠微漁潭明夜泊心憶謝玄暉

石塘路有懷院中諸公

迴合千峯裏晴光似畫圖征車隨返照候吏暎寒蕪
石瀨侵行逕溪雲拂路隅未酬知己分寧敢學潛夫

玉山嶺上作

悠悠驅足馬征路上連岡晚翠深雲竇寒苔淨石梁荻
花偏似雪楓葉不禁霜愁見前程遠空郊下夕陽

舟行夜泊

蕭蕭落葉送殘秋寂寞寒波急暝流今夜不知何處泊
斷猿晴月引孤舟

曉發桐廬

客路去漫漫桐溪上水難扣船乘曉月歌枕聽迴灘烟
重江楓濕沙平宿鷺寒閒吟試一望疑在畫屏看

夜汎臨平湖有寄

素彩皓通津孤舟入清曠已愛隔簾看還宜卷簾望隔
簾卷簾當此時惆悵思君君不知

次滕老莊

征途無旅館當晝喜逢君羸病仍留客朝朝掃白雲
曉

曉風搖五兩殘月映石壁稍稍曙光開片帆在空碧
晝

孤舟漾暖景獨鶴下秋空安流日正晝淨綠天無風

晚

古樹夕陽盡空江暮靄收寂寞扣船坐獨生千里愁

夜

猿聲到枕上愁夢紛難理寂寞深夜寒青露落秋水

宿嚴陵

身羈從事驅征傳江入新安泛暮濤今夜子陵灘下泊
自慙相去九牛毛

權文公集卷六

欽定四庫全書薈要卷一萬三千七百十二

集部

權文公集卷七

唐 權德輿 撰

雜詩

奉和韋諫議奉送水部家兄上後書情寄諸兄
弟仍通簡南宮親舊并呈兩省閣老院長

駟牡龍旂慶至今一門儒服耀華簪人望皆同照乘寶
家風不重滿籛金護衣直夜南宮靜焚草清時左掖深

何幸末班陪兩地陽春欲和意難任

奉和史館張閣老以許陳二閣長愛弟俱為尚
書郎伯仲同時列在南北省會於左掖因而
有詠

伯仲盡時賢平輿與潁川桂枝嘗徧折棣萼更相鮮丹
地晨趨並黃扉夕拜聯豈如分侍從來就鳳池邊

主客
水部

二員東西對行二閣老併在左掖時論以
為分就西垣則具美相類故歲書末韻

韋賓客宅與諸博士宴集

累抗乞身章湛恩比上庠賓筵徵稷嗣家法自扶陽簪
組歡言久琴壺雅興長陰嵐冒苔石輕籟韻風篴佩玉
三朝貴揮金百慮忘因知卧商雒豈勝白雲鄉

酬張秘監閣老喜太常中書二閣老與德興同

日遷官相代之作

時秘書監亦
同日拜命

珠樹共飛棲分封受紫泥正名推五字貴仕仰三珪
組心知忝德興代太
常為禮部晉章事頗齊蓬山有佳句喜氣在

新題

國子柳博士兼領太常博士輒申賀贈

博士本秦官求才帖職難臨風曲臺淨對月璧池寒講
學分陰重齋祠曉漏殘朝衣辨色處雙綬更宜看

過隱者湖上所居

蝸舍映平湖皤然一魯儒唯將酒作聖不厭谷名愚兵
法窺黃石天官辨白榆行看軟輪起未可號潛夫

從叔將軍宅薔薇花開太府韋卿有題壁長句

因以和作

環列從容蹠蹠歸光風駘蕩發紅薇
鶯藏密葉宜新霽
蝶遶低枝愛晚暉
艷色當軒迷舞袖
繁香滿徑拂朝衣
名卿洞壑仍相近
佳句新成和者稀

奉和許閣老霽後慈恩寺杏園看花同用花字

口號

時德輿
當直

杏林微雨霽灼灼滿瑤華
左掖期先至中園景未斜
含毫歌白雪藉草醉流霞
獨限金閨籍支頤啜茗花

奉和陳閣老寒食初假當直從東省往集賢因

過史館看木瓜花寄張蔣二閣老

晝漏沉沉倦瑣闈西垣東觀閱芳菲
繁花滿樹似留客應為主人休澣歸

晚秋陪崔閣老張秘監閣老苗考功同遊昊天
觀時楊閣老新直未滿以詩見寄斐然酬和
有媿蕪音

方駕遊何許仙源去勝歸縈迴留勝賞
瀟灑出塵機泛菊賢人至燒丹姹女飛
步虛清曉籟隱几吸晨暉竹逕

琅玕合芝田沆瀣晞銀鈎三洞字瑤笥六銖衣麗句翻
紅藥佳期限紫薇徒然一相望郢曲和應稀

春日同諸公過兵部王尚書林園

休沐君相近時容曳履過花間留客久臺上見春多松
色明金艾鶯聲雜玉珂更逢新酒熟相與藉庭莎

與沈十九拾遺同遊棲霞寺上方夜於亮上人
院會宿二首

攝山標勝絕暇日諧想矚縈紆松路深繚繞雲巖曲重

樓迴樹杪古像鑿山腹人遠水木清地深蘭桂馥層臺
聳金碧絕頂摩淨綠下界誠可悲南朝紛在目焚香入
古殿待月出深竹稍覺天籟清自傷人世促宗雷此相
遇偃放從所欲清論松枝低閒吟茗花熟一生如土梗
萬慮相桎梏永願事潛師窮年此棲宿

偶來人境外心賞幸隨君古殿煙霞夕深山松桂薰巖
花點寒溜石磴掃春雲清淨諸天近喧塵下界分名僧
康寶月上客沈休文共宿東林夜清猿徹曙聞

棲霞寺雲居室

一逕縈紆至此窮山僧盟漱白雲中閒吟定後更何事
石上松枝常有風

天竺寺

香刹西天寺昔遊如夢中煙蘿迷俗駕猿狖應山童蕭
颯松陰靜欹危石棧通雲霞棲半壁丹紺照晴空世界
悲何已心期惜未同相看整歸闕花雨夕濛濛

題邵端公林亭

春光何處足柱史有林堂鶯囀風初暖花開日欲長
畎池通舊水掃逕閱新芳更置盈樽酒時時醉楚狂

題隱者所居

一逕茅茨下千峯麋鹿群鴻妻同懶逸漁父每知聞
日暮鳥擇木天陰山出雲此心終不動鼓腹向堯君

題崔山人草堂

竹逕茅堂接洞天閒時麈尾漱春泉世人車馬不知處
時有歸雲到枕前

徐孺亭馬上口號并序

鍾陵東湖之南有亭亭中有二碑一則故曲江張公所
製徐徵君碣一則北海李公所製放生池碑臧夫二君
子久隨化往而二文之盛傳於天下貞元初余為是邦
從事每將迎郊勞多經是間且以其尚賢好生皆醇仁
之首也因歎不得與二賢同時論文變損益亭址圯壞
苔篆磷趺古風如在感舊依然而通衢在側平湖在下
波流轂擊日月無窮因於馬上口號絕句詩一首以寄

愀愴

湖上荒亭臨水開
龜文篆字積莓苔
曲江北海今何處
盡逐東流去不回

哭劉四尚書

勒於碑陰

士有昔賢人天朝喪守臣
才華推獨步聲氣幸相親
理析環中妙儒為席上珍
笑言成月旦風韻挹天真
丹地膺推擇青油寄撫循
豈言朝象魏翻是卧漳濱
命賜龍泉重追榮密印陳
撤絃驚物故庀具見家貧
牢落風悲

笛沈瀾涕泣巾只嗟蒿里月非復柳營春黃絹碑文在
青松隧路新音容無處所歸作北邙塵

張工部至薄寒山下有書無由馳報轉車之至
倍切悲懷

書來遠自薄寒山繚繞洮河出古關今日難裁秣陵報
薤歌寥落柳車還

工部發引日屬傷足卧疾不遂執紼

子春傷足日況有寢門哀元伯歸全去無由白馬來笳

簫里巷咽龜筮墓田開片石潺湲淚含悲叙史才

從事淮南府過亡友楊校書舊廳感念愀然

故人隨化往倏忽今六霜及我就拘限清風留此堂松
竹逾映蔚芝蘭自銷亡絕絃罷流水聞笛同山陽頗如
冰玉姿粲若鸞鳳章欲翥推勁翮先秋落貞芳正平賦
鸚鵡文考頌靈光二子古不弔夫君今何傷黃壚既杳
杳玄化亦茫茫豈必限宿草含悽洒衣裳

哭李晦羣崔季文二處士

華封西祝堯貴壽多男子二賢無主後貧賤大壯齒未
成鴻鵠姿遽頓驂騑趾子淵將叔度自古不得已

觀葬者

塗芻隨晝哭數里至松門貴盡人間禮寧知逝者魂笳
簫出古陌烟雨閉寒原萬古皆如此傷心反不言

成南陽墓

枯茨沒古墓駸薜蔽豐碑向晚微風起如聞坐嘯時

周平西墓

英威今寂寞陳跡對崇丘壯志清風在荒墳白日愁窮
泉那復曉喬木不知秋歲歲寒塘側無人水自流

蘇小小墓

萬古荒墳在悠然我獨尋寂寥紅粉盡冥冥黃泉深蔓
草暎寒水空郊暖夕陰風流有佳句吟眺一傷心

題柳郎中茅山故居

下馬荒堦日欲曛潺潺石溜靜中聞鳥啼花落人聲絕
寂寞山牕掩白雲

哭張十八校書

數日前辱書未及還荅俄承凶訃

芸閣為郎一命初
桐州寄傲十年餘
魂隨逝水歸何處
名在新詩衆不如
蹉跎江浦生華髮
牢落寒原會素車
更憶八行前日到
含悽為報秣陵書

題亡友江畔舊居

寥落留三徑
柴扉對楚江
蟪蛄集暗壁
蜥蜴走寒牕
松蓋欹書幌
苔衣上酒缸
平生斷金契
到此淚成雙

權文公集卷七